

- 5 Tho drúhtin Krist gibóran uuard (thes méra ih ságen nu ni thárf),
 thaz bliði uuórolt uuurti theru sáligun gibúrta,
 Thaz ouh gidán uuúrta, si in éuon ni firvuúrta
 (iz uuás iru anan hénti, tho détt es druhtin énti):
 Tho quamun óstana in thaz lánt thie írskantun súnnun fart,
- 10 stérron girústi: thaz uuárun iro lísti.
 Sie éiscotun thes kúndes sario théssinthes
 ioh kúndtun ouh tho mári, thaz er ther kúning uuari;
 Uuarun frágenti, uuar er gibóran uuurti,
 ioh bátun io zi nóti, man in iz zéigoti.
- 15 Sie zaltun séltsani ioh zéichan filu uuáhi,
 uuúntar filu hébigaz (uuanta er ni hórta man thaz,
 Thaz io fon mágadburta man gibóran vuurti)
 intj ouh zéichan sin scónaz in himile so scínaz;
 Ságetun, thaz sie gáhun stérron einan sáhun,
- 20 ioh dátun filu mári, thaz er sín uuari:
 'Uuir sáhun sinan stérron, thoh uuir therz búrgi irron,
 ioh quámun, thaz uuir bétotin, gináda sino thigitin.
 Ostar filu férro so scéin uns ouh ther stérro;
 ist íaman hiar in lánthe es fauuhlt thoh firstánte?
- 25 Gistiri záltun uuir io, ni sáhun uuir nan ér io:
 bithiu bírun uuir nu giéinot, er niuan kúning zeinot.
 So scribun uns in lánthe man in uuóroltj alte;
 thaz ír uns ouh gizéillet, uuio iz íuuo buah singent.'
 So thíu uuort tho gáhun then kúning ana quámun,
- 30 hántarquam er hártu thero sélbero uuorto,
 Ioh mánnliches hóubit uuárd es thar gidruábit:
 gibórtun úngerno thaz uuir nu niazen gérho.
 Thie búachara ouh tho tháre gísamanota er sare,
 sie uuas er frágenti, uuar Krist giboran uurti;
- 35 Er sprah zen éuuarton sélben thesen uuórton.
 gab ármer ioh ther richo ántuurti gilicho,
 Thia burg nántun se sár, in féstiz datun álaunar
 mit uuórton then ér thie áltun fórasagon záltun.
 So er giuúisso thar bifánd, uuar drúhtin Krist gibóran uuard,
- 40 tháht er sar in fésti mihilo únkusti.
 Zi ímo er ouh tho ládota thie uuísun man theih ságeta,
 mit in gístuant er thíngon ioh filu hálingon.
 Thia zít éiscota er fon ín, so ther stérro giuon uuas quéman zj
 bat sie iz ouh bíruáhtin, bi thaz selba kind írsúahtin. [in,
- 45 'Gidúet mih', quad er, 'ánauuart bi thes stérren fart,
 so fáret, eiscot tháre bi thaz kind sáre.
 Sin éiscot íolicho ioh filu giuuáralicho,
 slfumo duet ouh thánne iz mir zi uuízzanne.
 Ih uuíllu faran béton nan (so ríet mir filu márag man),
 thaz ih tharzúa githíngé ioh ímo ouh géba bringe.'
- 50 Lóug ther uuénego mán: er uuánkota thar filu frámg;
 er uuólta nan írthuesben ioh uns thia fráma írlesgen. —